

T7970/2240(14)

ST. JOHN'S COLLEGE LIBRARY
ST. JOHN'S COLLEGE, NEWCASTLE
NEWCASTLE, AUSTRALIA

MAR 22 1958

CHINESE - JAPANESE LIBRARY
HARVARD - YENCHING INSTITUTE
AT HARVARD UNIVERSITY

MAR 24 1958

神農本草經疏卷之十九

禽部三品

總五十六種今疏其要者四種

雞

烏骨雞
尿白

雞冠血
雞子

肝

抱出卵殼

肚腔裏黃皮

雀卵
附雄雀尿

天鼠尿

白鴿

諸雞

疏○按雞爲陽禽屬木而外應乎風故在卦

哈佛大學哈佛燕京
圖書館珍藏印

爲巽其色雖有丹白黃烏其種復有烏骨之
異總之性熱補陽起陰兼有風火之義惟烏
骨者別是一種獨得木木之精故主陰虛發
熱蓐勞崩中等證也

簡誤

雞性熱動風凡熱病初愈癰疽未潰素有風
病人咸忌之弘景云小兒五歲以下食雞生
蛇蟲雞肉不可合葫芥李食不可合犬肝犬

腎並令人洩痢同兔食成痢同魚汁食成心
痕同鯉魚食成癰癤同獺肉食成遁尸同生
葱食成蟲痔同糯米食生蛇蟲年久老鷄腦
有大毒食之能發疔中其毒發疔者以玉樞
丹丸可解

○烏骨鷄味甘平無毒主補虛勞羸弱消渴中
惡鬼擊心腹痛益產婦治女人崩中帶下一
切虛損諸疾

疏○烏骨鷄得水木之精氣其性屬陰能走
肝腎血分補血益陰則虛勞羸弱可除陰回
熱去則津液自生渴自止矣陰平陽秘表裏
固密邪惡之氣不得入心腹和而痛自止鬼
亦不能犯矣益陰則衝任帶三脉俱旺故能
除崩中帶下一切虛損諸疾也古方烏骨鷄
丸治婦人百病者以其有補虛益陰入血分
之功也

主治參互

古方烏骨鷄丸治婦人產後蓐勞及陰虛等
證方中半夏人參乃立方者之誤宜去之

用骨一具煨存性同紅藥子白及白欵冰片

雄黃朱砂乳香沒藥醋蜜調傅一切癰疽腫

毒神効 治中惡心腹痛欲死但殺白烏骨

鷄乘熱薄心卽瘥如鬼擊卒死用其熱血塗

心下亦妙

祖香珍
準配

○鷄冠血主乳難用三年老雄者取其陽氣充溢也凡風中血脉則口角僻喎冠血鹹而走血透肌肉故以之治中風口喎不正塗頰上効丹雄鷄爲陽禽冠血乃諸陽之所聚故能治中惡客忤邪氣高武痘疹正宗云雞冠血和酒服發痘最佳雞屬巽屬風頂血至清至高故也

主治參互

記準

皆効方對口毒瘡熱鷄冠血頻塗之取散青囊襍纂中蜈蚣毒舌脹出口是也雄雞冠血浸舌并咽之勝金方諸蟲入耳鷄冠血滴入卽出

簡誤

痘瘡須分寒熱鷄血性溫天行瘡子虛寒者得之固可資其起發倘因血熱而乾枯焦黑者誤用之能更轉劇世人類用雞血桑蠶蟲

發痘而不分寒熱誤也

○肝主起陰氣

疏○肝本經主起陰氣性溫可知味甘微苦入足厥陰少陰經今人用以治小兒疳積眼目不明者取其導引入肝氣類相感之用也

主治參五

同燕萸使君子胡黃連青黛五穀蟲殼精草
盧會治小兒疳熱日生障翳 千金方陰痿

起有珍

不起用雄雞肝三具兔絲子一升為末雀卵

和丸小豆大每五六十九酒下日二服

○屎白微寒主消渴傷寒寒熱破石淋及轉筋

利小便止遺溺滅癥瘕

雄雞屎乃有白臘月收之白鷄鳥骨者更

良素問作雞矢

疏○雞屎白微寒乃腸胃所出之物故復能

走腸胃治病素問云心腹滿且食不能暮食

名為鼓脹治之以雞矢醴一劑知二劑已王

太僕註云本草雞矢並不治蠱脹但能利小便
使蓋蠱脹皆生于溼熱溼熱脹滿則小便不利
利難尿能通利下泄則溼熱從小便而出蠱
脹自愈故曰治溼不利小便非其治也本經
主石淋利小便止遺溺者正此意耳轉筋者
血熱也傷寒寒熱及消渴者熱在陽明也癥
痕者血熱壅滯肌肉也寒能總除諸熱故主
之也日華子炒服治中風失音痰迷陳藏器

和黑豆炒酒浸服治賊風風痺蓋風為陽邪
因熱而生雞屎寒能除熱雞本與風木之氣
相通取其治本從類之義也

主治參互

普濟方雞矢醴治鼓脹且食不能暮食用臘
月乾雞矢白半斤袋盛以酒醅一斗漬七日
溫服三盃日三或為末服二錢亦得 積善
堂經驗方治一切肚腹四肢腫脹不拘鼓脹

趙五斤
治腫脹

氣脹溼脹水脹等用乾雞矢一升炒黃以酒
 醅三碗煮一碗濾汁飲之少頃腹中氣大轉
 動利下即自脚下皮皺消也未盡隔日再作
 ○雞子主除熱火瘡癩瘵卵白微寒療目熱赤
 痛除心下復熱止煩滿欬逆小兒下洩婦人
 產難胞衣不出醃漬之一宿療黃疸破大煩
 熱
 疏○雞子稟生化最初之氣如混沌未分之

形故卵白象天其氣清其性微寒卵黃象地
 其氣濁其性微溫卵則兼清濁而為體其味
 甘氣平無毒凡癩瘵皆火熱為病雞子之甘
 能緩火之標平即兼涼能除熱故主癩瘵及
 火瘡并治傷寒少陰咽痛神効

主治參互

醫方集成年深哮喘雞子略敲損浸尿缸中
 三四日煮食能去風痰 又方用頭生雞卵

七枚童便浸七日取出煮熟每日食一枚永
不出痘 仲景苦酒湯治少陰病咽中傷生
瘡痛不能語言聲不出者用半夏十四枚碎
鷄子一枚去黃內入半夏苦酒令滿置刀環
中安火上令三沸去滓少少含嚥之不瘡更
作此方有神効 普濟方咽寒生瘡乾嘔頭
痛食不下法同上無半夏 經驗秘方湯火
燒灼雞子清和酒調洗勤洗止痛生肌 普

濟方塗面駐顏雞子一枚開孔去黃留白入
金華臙脂及桑礪少許紙封與雞抱之俟別
卵抱出以塗面洗之不落半年尚紅也 仲
景方治少陰病得之二三日以上心中煩不
得臥者用黃連黃芩芍藥阿膠雞子黃先煎
三物成去滓膠烱盡小冷雞子黃攪勻溫服
劉禹錫傳信方亂髮雞子膏治孩子熱瘡
効見髮髮條下

○抱出卵殼研末磨障翳取其蛻脫之義也蘇頌又主傷寒勞復熬令黃黑為末熱湯和一合服取汗出即愈炒研細傳下疳亦妙卵中白皮主久欬氣結得麻黃紫苑和服之立止○批脰裏黃皮微寒主洩利小便利遺溺除熱止煩

疏○此即肫內黃皮一名雞內金是也肫是雞之脾乃消化水穀之所其氣通達大腸膀

金雞內

胱二經有熱則洩痢遺溺得微寒之氣則熱除而洩痢遺溺自愈矣煩因熱而生熱去故煩自止也今世又以之治諸疳瘡多効

主治參互

記趙康長淋瀝痛一名雞內金

醫林集要小便淋瀝痛不可忍雞肫內黃皮

五錢陰乾燒存性作一服白湯下立愈子

母秘錄鵝口記白瘡雞肫內黃皮為末乳服半

錢并可傳之 經驗方走馬牙疳雞肫內黃

趙不功

皮不落者五枚焙存性枯礬一錢研細搽
并治陰頭疔蝕

雀卵味酸溫無毒主下氣男子陰痿不起強之
令熱多精有子

疏○雀屬陽其氣溫味酸其性滌故能入下

焦陰分能補煖兩腎夫人身兩腎左為腎右

為命門記左屬水為陰右屬火為陽天非此火

不能生物人非此火不能有生又云陽生則

趙希珍
記準用

陰長可見命門真陽之氣乃人身生化之本

也故命門衰敗則陰痿精寒絕化育之道雀

卵性溫補煖命門之陽氣則陰自熱而強精

自足而有子也溫主通行性又走下故主下

氣也弘景云術家和天雄服之令莖大不衰

孟詵云和天雄兔絲子末為丸空心酒下五

丸治男子陰痿女子帶下便溺不利除疝瘕

以其有溫煖命門之功也肉味甘溫功用不

及卵

○雄雀屎療目痛決癰癰女子帶下溺不利除
疝瘕一名白丁香一頭尖者是雌兩頭圓者是雌凡用研細甘草水浸一宿焙乾用
疏○雀屎本經無氣味察其所主應是辛苦
溫之物性善消散故外用療目痛決癰癰內
服治帶下溺不利疝瘕也蘇恭以首生男子
乳研雀屎成泥點目中弩肉赤脉貫瞳子者
卽消神効蓋取其辛散拔出火毒之義也

主治參互

子母秘錄小兒中風口噤乳不下雀屎丸如
麻子大眼二丸卽愈 梅師方諸癰癰已成
膿不肯次懼鍼者塗雀屎瘡頭卽易決 普
濟方喉痺乳蛾白丁香二十箇以沙糖和作
三丸每以一丸綿裏含嚙卽時遂愈甚者不
過二丸極有奇効

簡誤

題香

雀肉及卵陰虛火盛者忌之不可合李食妊婦食雀肉飲酒令子多淫凡服木人忌之雀尿療目痛非風熱外邪者不宜用女子帶下溺不利屬腎虛有火者並忌之古方同天雄服此藥性極熱有大毒非陰臟及真陽虛憊者慎勿輕餌

天鼠屎味辛寒無毒主面癰腫皮膚洗洗時痛腹中血氣破寒熱積聚除驚悸去面黥一名夜明沙

疏○天鼠夜出喜食蚊蚋故其屎中淘出細沙皆未化蚊蚋眼也所以今人主明目治目盲障翳取其氣類相從也其味辛寒乃入足厥陰經藥本經所主諸證總屬是經所發取其辛能散內外結滯寒能除血熱氣壅故也然主療雖多性有專屬明目之外餘皆可略

主治參互

聖惠方青盲障翳夜明沙一兩栢葉炙一兩

爲末牛膽汁和丸梧子大每夜臥時竹葉湯
下二十九 又方五瘡不止夜明沙末每冷
茶服一錢立効并治胎前瘡除目疾外他用
甚稀故不立簡誤

白鴿味鹹平無毒肉主辟諸藥毒及人馬久患
疥又云煖無毒調精益氣治惡瘡疥并風瘙白
癩癰瘍風

疏○白鴿稟木金之氣故其味鹹氣平無毒
腎藏精腎納氣肺主皮毛鹹入腎故能調精
益氣平則兼辛入肺故能主惡瘡疥及白癩
癰瘍風凡毒藥之性多熱鴿得金水之氣故
又能辟諸藥毒也其屎名左盤龍亦能主人
馬疥瘡

主治參互

食鹽心鏡治消渴飲水不知足用白花鴿切
作小片以土蘇煎含之嚙汁 潯江方預辟

晁

痘毒用白鴿卵一對入竹筒封置廁中半月
 取出以卵白和辰砂三錢丸菜豆大每服三
 十九九豆子飲送下毒從大小便出也 保命
 集破傷中風病傳入裏用左盤龍白殭蠶各
 炒半錢雄芎一錢為末蒸餅丸梧子大每服
 十五丸溫酒下取效 聖惠方頭痒生瘡白
 鴿屎二合醋煮三沸杵傳之日三上 又方
 頭瘡白 充鴿糞研末先以醋米泔洗淨敷之

簡誤

鴿本經雖云調精益氣其用止長於去風解
 毒然而未必益人故孟詵云食多減藥力今
 世勞怯人多畜養及煮食之殊未當也

神農本草經疏卷之二十

蟲魚部上品

總五十種今疏其要者十三種

石蜜

蜜蠟

牡蠣

龜甲

真珠

瑤瑁

桑螵蛸

石決明

文蛤

蠶魚

鯽魚

鱣

鯉魚膽附肉鱗

石蜜味甘平無毒微溫主心腹邪氣諸驚癇瘧
安五藏諸不足益氣補中止痛解毒除衆病和
百藥養脾氣除心煩食飲不下止腸澼肌中疼
痛口瘡明耳目久服強志輕身不饑不老延年
神仙

瘧作瘧

疏○石蜜蜂採百花釀成故本經味甘氣平
別錄微溫無毒得草木羣英之精華合露氣
以釀成故其氣清和其味純甘施之精神氣

血虛實寒熱陰陽內外諸病罔不相宜經曰
裏不足者以甘補之若爲土化土爲萬物之
母石蜜具天地間至甘之味故能安五藏諸
不足及益氣補中除衆病也心經有熱則爲
諸驚癇瘧得甘緩之氣則心火降煩熱除諸
驚癇瘧平矣諸痛癢瘡瘍皆屬心火故又能
止肌中疼痛及口瘡也甘主解毒故能和百
藥甘主入脾故能養脾氣脾氣得所養而飲

食自下腸澀止矣五臟足氣血充則耳目聰
明不饑不老輕身強志延年神仙所自來矣

主治參互

同蘆根汁梨汁人乳牛羊乳童便治噎膈大
便燥結用此潤之有痰加竹瀝 煉熟和諸
丸藥及膏子主潤五藏益血脈調脾胃通三
焦塗火灼瘡能緩痛 仲景方蜜導煎治陽
明病自汗小便反利大便鞭者用蜜二合銅

器中微火熬之候凝如飴狀至可丸乘熱捻
作挺令頭銳大如指長寸半許候冷納穀道
中少頃卽通也一法加皂角細末二分攪勻
尤速 產書產後口渴用熟蜜不計多少熟
水調服卽止 全幼心鑑痘癩作癢難忍抓
成瘡及痂欲落不落百花膏主之用上等石
蜜不拘多少湯和時時以翎刷之効 肘後
方天行虜瘡頭面及身須臾周匝狀如火瘡

皆戴白漿隨決隨生不卽療數日必死差後
瘡癥黯色一歲方滅此惡毒之氣深入也用
蜜入升麻煎過數數拭之

簡誤

石蜜雖稱補五藏益脾胃然而生者性寒滑
能作泄大腸氣虛完穀不化者不宜用嘔家
酒家不宜用中滿蠱脹不宜用溼熱脚氣不
宜用生者有小毒尤不宜食青赤酸者食之

記準

令人心煩不可與生葱同食害人若與萵苣
同食令人利下食蜜飽後不可食鮓令人暴
亡

蜜蠟味甘微溫無毒主下痢膿血補中續絕傷
金瘡益氣不饑耐老 白蠟療久洩澼後重見
白膿補絕傷利小兒久服輕身不饑

疏○蠟石蜜之凝結於底者也蜜性緩質柔
故主潤臟腑經絡蠟性濇質堅故能療久痢

洩瀉後重下膿血也甘能益血補中溫能通
行經脈故主續絕傷及金瘡也中得補則氣
自益故久服能不饑輕身耐老也男子女人
大小內外皆可施而別錄獨云利小兒者非
也

主治參互

得象牙末等能去漏管長肉見象牙條下
得膩粉真珠末黃檗末龍腦香鉛丹蛙竹筍

聖藥

聖藥

葱白猪脊髓治陰蝕惡瘡 同孩兒茶鉛丹

胡粉水龍骨粉霜龍骨黃檗猪膽汁炙猪脂

作膏治內外癩瘡久不愈 金匱方調氣飲

治赤白痢少腹痛不可忍後重或面青手足

俱變者用黃蠟三錢阿膠三錢同溶化入黃

連末五錢攪勻分三次熱服神効 千金方

膠蠟湯治熱痢記及婦人產後下痢用蠟二基

子大阿膠二錢當歸二錢半黃連三錢黃檗

一錢陳廩米半升水三升煮至一升去米入藥煎至一鍾溫服神効

簡誤

火熱暴痢不宜用

牡蠣味鹹平微寒無毒主傷寒寒熱溫瘧洒洒驚志怒氣除拘緩鼠瘦女子帶下赤白除留熱在關節榮衛虛熱去來不定煩滿止汗心痛氣結止渴除老血瀉大小腸止大小便療洩精喉

痺咳嗽心脇下痞熱久服強骨節殺邪鬼延年

貝母爲之使得甘草牛膝遠志蛇牀子良惡麻黃細辛吳茱萸

疏○牡蠣得海氣結成故其味鹹平氣微寒無毒氣薄味厚陰也降也入足少陰厥陰少陽經其主傷寒寒熱溫瘧洒洒驚志怒氣留熱在關節去來不定煩滿氣結心痛心脇下痞熱等證皆肝膽二經爲病二經冬受寒邪則爲傷寒寒熱夏傷於暑則爲溫瘧洒洒邪

六
伏不出則熱在關節去來不定二經邪鬱不散則心脇下痞熱邪熱甚則驚恚怒氣煩滿氣結心痛此藥味鹹氣寒入二經而除寒熱邪氣則榮衛通拘緩和而諸證無不瘳矣少陰有熱則女子爲帶下赤白男子爲洩精解少陰之熱而能斂滯精氣故主之也鹹屬水屬陰而潤下善除一切火熱爲病故又能止汗止渴及鼠瘻喉痺咳嗽也老血者宿血也

鹹走血而軟堅所以主之其性收斂故能滯大小腸止大小便利也腎主骨入腎益精則骨節自強邪本因虛而入肝腎足則鬼邪自去人以腎爲根本根本固則年自延矣更能止心脾氣痛消疝瘕積塊癭瘤結核脇下堅滿等證皆寒能除熱鹹能軟堅之功也

主治參互

同生地黃黃耆龍眼五味子酸棗仁麥門冬

白芍藥伏神黃檗當歸治心腎虛盜汗 同
 黃檗五味子地黃山茱萸枸杞子車前子沙
 苑蒺藜蓮鬚杜仲治夢遺泄精加牛膝則兼
 治赤白濁 同地黃黃檗阿膠木耳炒黑香
 附白芍藥地榆麥門冬續斷青蒿鼈甲蒲黃
 止婦人崩中下血及赤白帶下 仲景方同
 龍骨入柴胡桂枝各湯內取其收斂浮越之
 陽氣固脫而鎮驚更能除胸脇中痞硬 藏

看傷
 寒百合
 病

器方同麻黃根蛇牀子為粉去陰汗 本事
 方虛勞盜汗牡蠣粉麻黃根黃耆等分為末
 每服二錢水煎服 仲景金匱玉函方傷寒
 傳成百合病如寒無寒如熱無熱欲臥不臥
 欲行不行欲食不食口苦小便赤色得藥則
 吐變成渴疾久不差者用牡蠣煨二兩栝樓
 根二兩為細末每服方寸七用米飲調下日
 三服 古今錄驗方水病囊腫牡蠣粉二兩

乾姜炮一兩研細冷水調稠掃上須臾囊熱
如火乾則再上小便利卽愈一方用葱汁白
麵同調小兒不用乾姜 經驗方男女瘰癧
用牡蠣粉四兩玄參末三兩甘草一兩麵糊
丸梧子大每三十九酒下日三服服盡除根
不拘已破未破皆効 普濟方月水不止牡
蠣煨研細米醋搜成團再煨研末以米醋調
艾葉末熬膏丸梧子大每用醋湯下四五十

丸

簡誤

凡病虛而多熱者宜用虛而有寒者忌之腎
虛無火精寒自出者非宜

龜甲味鹹甘平有毒主漏下赤白破癥瘕瘧
五痔陰蝕溼痺四肢重弱小兒顛不合頭瘡難
燥女子陰瘡驚恚氣心腹痛不可久立骨中寒
熱傷寒勞復或肌體寒熱欲死以作湯良久服

輕身不饑益氣資智亦使人能食勿令中溼中溼卽有毒

疏○介蟲三百六十而龜爲之長稟金水之氣故味鹹而甘氣平其性神靈能變化凡入藥勿令中溼中溼則遂其變化之性而成癥瘕於腹中故言有毒也氣味俱陰入足少陰經方家多入補心藥用以心藏神而龜性有神借其氣以相通且得水火旣濟之義實非

補心之正藥也其主骨中寒熱及傷寒勞復肌體寒熱欲死痲瘧者皆陰虛而邪熱爲病經口傷於溼者下先受之溼痺四肢重弱亦腎陰虛而邪氣易犯腎主骨腎虛則小兒顛門不合腎爲五臟陰中之陰陰虛則火熱偏至而爲驚恚氣心腹痛此藥補腎家之真陰則火氣自降而寒熱邪氣俱除矣益陰除熱軟堅故主漏下赤白癥瘕五痔陰蝕陰瘡及

小兒頭瘡也。經曰：邪熱不殺穀，熱去故令人能食。能食則脾胃得所養而能思。思作睿，故資智。久服益氣輕身，不饑者除熱益陰之功也。

主治參互

丹溪方補陰丸用龜下甲酒炙熟，地黃蒸曬各六兩，黃檗知母各四兩為末，以猪脊髓和。尤梧子大每百丸，空心溫酒下。
摘玄方治

香珍記準

產三五日不下，垂死及短小女子交骨不開者，用乾龜殼一箇酥炙，頭髮一握燒灰，川芎當歸各一兩為末，和勻，每服七錢水煎服。如人行五里許，再一服，生胎死胎俱下。

簡誤

按龜鼈二甲本經所主大畧相似，今人有喜用鼈甲惡用龜甲者，有喜用龜甲惡用鼈甲者，皆一偏之見也。二者咸至陰之物，鼈甲走

肝益腎以除熱龜甲通心入腎以滋陰第鼈
甲無毒可多用龜甲非千年自死者則有毒
故方書所用曰敗龜板者取其長年則得陰
氣多故有益陰之功用耳若今新剖之甲斷
乎有毒不宜頻使用者不可不詳辨也妊婦
不宜用病人虛而無熱者不宜用凡入藥須
研極細不爾留滯腸胃能變癥瘕也

真珠寒無毒主手足皮膚逆臚鎮心綿裹塞耳
主聾傳面令人潤澤好顏色粉點目中主膚腎
障膜

疏○珠稟太陰之精氣而結故中秋無月則
蚌無胎其體光明其性堅硬大小無定要以
新定未經鎖綴者爲上味甘微鹹氣寒無毒
入手少陰足厥陰經心虛有熱則神氣浮越
肝虛有熱則目生膚腎障膜除二經之熱故
能鎮心去目中障腎也耳聾本屬腎虛有熱

所以主之逆臚者臚脹也胸腹脹滿氣逆以及於手足皮膚皆腫也經云諸溼腫滿屬脾土又云諸腹脹大皆屬於熱此因脾虛有熱兼有積滯所致真珠味甘亦能益脾氣寒能除熱體堅能磨積消滯故主手足皮膚逆臚也古人未發斯義所以方書叙論不詳亦為闕略也珠藏於澤則川自媚况塗面寧不令人潤澤好顏色乎凡小兒驚熱風癩為必須

之藥

主治參互

同丹砂牛黃犀角天竺黃茯神遠志鈞藤鈎琥珀金箔治小兒驚癇風熱大人失志癲狂等證 同爐甘石龍腦香白鵬砂空青人爪點目能去腎障 同鍾乳石象牙末牛黃冰片白殭蠶紅鉛天靈蓋蛙竹屑樺皮灰沒藥明礬治廣瘡結毒及陰蝕瘡有奇効 同人

趙香

中白黃檗青黛鵬砂和水片少許治口疳加
 入雞內金膩粉治下疳 格古論灰塵迷目
 用大珠挹之則消 千金方婦人難產或胞
 衣不下真珠末一兩酒服立出 聖惠方肝
 虛日將真珠末一兩白蜜二合鯉魚膽二枚
 和合銅器煎至減半新綿濾過瓶盛頻點取
 瘡 痘瘡發疔毒方見穀部豌豆下

簡誤

真珠體最堅硬研如飛麵方堪服食不細能
 傷人臟腑病不由火熱者勿用

毒瑁寒無毒主解嶺南百藥毒 一名玳瑁

疏○毒瑁龜類也得水中至陰之氣故氣寒
 無毒而解一切熱毒其性最靈凡遇飲食有
 毒則必自搖動然須用生者乃靈死者則不
 能矣嶺南人善以諸毒藥造成蠱人中之則
 昏憤悶亂九竅流血而死惟用活毒瑁刺其

血飲或生者磨濃汁服之可解日華子主破
癥結消癰腫止驚癇陳士良主心風解煩熱
行氣血利大小腸以其性稟純陰氣味至寒
故治如是等病也又能解痘毒神効

主治參互

楊氏產乳方解一切蠱毒生玳瑁磨濃汁服
蓋卽消 靈苑方預解痘毒遇時行痘癩
服此未發內消已發稀少用生玳瑁生犀角

各磨濃汁一合和勻溫服半合日三最良
聞人規痘癩論痘癩黑陷乃心熱血凝也法
同上加入猪心血少許紫草汁五匙和勻溫
服 鴻飛集迎風目淚乃肝腎虛熱也用生
玳瑁羚羊角各一兩石燕一雙爲末每一錢
薄荷湯下日二服

簡誤

痘瘡虛寒不起發者不宜服

桑螵蛸味鹹甘平無毒主傷中疝瘕陰痿益精
生子女子血閉腰痛通五淋利小便水道又療
男子虛損五臟氣微夢寐失精遺溺久服益氣
養神二月三月採蒸之當火炙不爾令人洩

疏○桑螵蛸桑樹上螳螂子也稟秋金之陰
氣兼得桑木之津液本經味鹹氣平別錄甘
無毒氣薄味厚陰也入足少陰太陽經人以
腎為根本男子腎經虛損則五臟氣微或陰

痿夢寐失精遺溺鹹味屬水內合於腎腎得
之而陰氣生長故能愈諸疾及益精生子也
腎與膀胱為表裏腎得所養則膀胱自固氣
化則能出故利水道通五淋也女子屬陰肝
腎用事疝瘕血閉腰痛皆二經為病鹹能益
陰入血軟堅是以主之甘能補中故主傷中
益氣腎足則水自上升克與心交故能養神
也

主治參互

外臺秘要虛勞盜汗遺精白濁桑螵蛸炙白
龍骨等分爲細末每服二錢空心鹽湯下
寇宗奭方桑螵蛸散治男子房勞小便日數
十次如稠米泔心神恍惚瘦瘁食減其藥安
神魂定心志治健忘補心氣止小便數用桑
螵蛸遠志龍骨菖蒲人參茯神當歸龜甲各
如法製各一兩爲末臥時人參湯調下二錢

千金翼婦人遺尿桑螵蛸酒炒爲末白湯

服二錢兼治胎前產後遺尿不禁

簡誤

桑螵蛸氣味雖鹹平走腎利水道然得秋時
收斂之氣凡失精遺溺火氣太盛者宜少少
用之

石決明味鹹平無毒主目障腎痛青盲久服益

精輕身凡用以麵裹煨熟磨去粗皮搗細如飛
麵方堪入藥一名千里光得龍骨療洩

精畏旋
覆花

疏○石決明得水中之陰氣以生故其味鹹
氣應寒無毒乃足厥陰經藥也足厥陰開竅
於目目得血而能視血虛有熱則青盲赤痛
障翳生焉鹹寒入血除熱所以能主諸目疾
也鹹寒又能入腎補陰故久服益精輕身也
研細水飛主點外障翳

主治參互

得甘菊花花生地黃木賊草穀精草羚羊角人
爪蟬蛻空青蜜蒙花決明子夜明沙治青盲
障翳 明目集驗方羞明怕日用千里光甘
菊花甘草各二錢水煎冷服 鴻飛集痘後
目翳用石決明火煨研谷精草各等分爲細
末以猪肝蘸食 目疾外他用甚稀故無簡
誤

文蛤味鹹平無毒主惡瘡蝕五痔欬逆胸痺腰

痛脇急鼠瘦大孔出血崩中漏下

疏○文蛤即花蛤大小背上有班文得陰水之氣故其味鹹氣平無毒經曰硬則氣堅鹹以軟之文蛤之鹹能消散上下結氣故主欬逆胸痺腰痛脇急也惡瘡蝕五痔鼠瘦大孔出血崩中漏下皆血熱為病鹹平入血除熱故主之也更能止煩渴化痰利小便

主治參互

仲景方傷寒在陽當以汗解反以冷水噴之或灌之其熱被却不得去更益煩熱皮上粟起欲飲水反不渴者文蛤散主之文蛤五兩為末每服方寸匕沸湯下甚効 千金翼疔蝕口鼻數日欲盡文蛤燒灰以臘猪脂和塗之

簡誤

病屬邪熱痰結者宜之氣虛有寒者不得用

蠡魚味甘寒無毒主溼痺面目浮腫下大水療
五痔有瘡者不可食令人癩白

疏○蠡魚稟北方玄水之精得中央陰土之
氣故其色黑味甘氣寒無毒乃益脾除水之
要藥也土虛則水泛濫土堅則水自清凡治
浮腫之藥或專於利水或專於補脾其性各
自爲用惟蠡魚色黑象水能從其類以導橫
流之勢味甘土化能補其不足以遂敦阜之

性補瀉兼施故主下大水及溼痺面目浮腫
有神効也五痔因溼熱所生水去則溼氣自
除今世俗小兒痘後咸食之然而早食多食
能令皮膚癩痕皆黑本草獨云有瘡者食之
令人癩白非也孟詵主下大小便壅塞氣作
鱸與脚氣風氣人食良蘇頌主妊娠有水氣
竝取其除溼下水益脾之功也

主治參互

同白朮茯苓橘皮姜皮煮食下水腫大効
與蒜作鱠食能去溼下水食醫心鏡治十種
水氣垂死蠡魚一斤重者煮汁和冬瓜葱白
作羹食 靈苑方喉痺將死者以蠡魚膽點
入少許卽差病深者水調灌之諸魚膽皆苦
惟此膽甘可食爲異耳

簡誤

蠡魚其功專於去溼下水他 無所長且多

食能發痼疾不可不知也

鯽魚合蓴作羹主胃弱不下食作鱠主久赤白
痢燒灰塗諸瘡或取猪脂煎用又主腸癰

疏○鯽魚稟上氣以生故其味甘其氣溫無
毒是以能入胃治胃弱不下食入大腸治赤
白久痢腸癰脾胃主肌肉甘溫能益脾生肌
故主諸瘡久不瘥也藏器主虛羸大明主溫
中下氣孟詵云調中益五臟表其益脾和胃

之功也

主治參互

百一選方腸風下血用活鯽魚一大尾去腸
留鱗入五倍子末填滿泥固煨存性爲末酒
服一錢一方入白礬末二錢外以椶包更以
紙裹煨存性研末每二錢米飲下 經驗方
膈氣吐食用大鯽魚去腸留鱗切大蒜片填
滿腹紙包十重泥固曬半乾炭火煨熟單取
肉用和平胃散一兩杵丸梧子大密藏每服
三十丸米飲下

簡誤

鯽魚調胃實腸與病無礙諸魚之中惟此可
常食但不宜與沙糖同食生疔蟲同芥菜食
成腫疾同猪肝雞肉雉肉鹿肉食生癰疽同
麥門冬食害人

鱠味甘大溫無毒主補中益血療瀋唇

疏○鱠魚得土中之陽氣以生故其味甘氣
大溫甘溫具足所以能補中益血甘溫能通
經脉療風邪故又主藩唇及今人用之以治
口眼喎斜也

主治參互

與黃耆同食能益氣力 治火丹赤腫生鱣
血塗之効

簡誤

性熱而補凡病屬虛熱者不宜食時行病後
食之多復過食動風氣兼令人霍亂

鯉魚膽味苦寒無毒主目熱赤痛青盲明目久
服強悍益志氣

疏○凡膽皆苦寒走厥陰故鯉魚膽亦主明
目及目熱赤痛青盲也肝為將軍之官腎為
作強之官二經有熱則虛怯志氣衰苦寒除
二經之熱故久服強悍益志氣也

○鯉魚肉味甘主欬逆上氣黃疸止渴生者主水腫脚滿下氣

疏○鯉魚稟陰極之氣故其鱗三十六陰極則陽復故素問言魚熱中其氣味雖甘平然多食能令人發風熱也甘可以緩故主欬逆上氣止渴陰中有陽能從其類以導之故能利小便使黃疸水腫脚氣俱消也河間云鯉之治水因其氣以相感者是矣

主治參互

外臺秘要治水腫用大鯉一尾赤小豆一升水二斗煮可二升餘瀘去滓頓服盡當下利利盡卽瘥并治妊娠水腫有神効

○鱗主產婦腹痛燒灰酒服亦治血氣雜諸藥用之

疏○魚鱗得水中之陽氣而鯉魚鱗則又稟陰極生陽之數性能入血散滯入血者陰之

用也散滯者陽之用也故主婦人產後腹痛
及血氣不和等證

主治參互

和劑局方烏金散治產後血迷血暈敗血不
止淋瀝不斷臍腹疼痛及崩中下血過多不
止鯉魚鱗燒血竭百草霜亂髮灰松墨煨酢
淬延胡索當歸赤芍藥等分爲末每二錢溫
酒下 外臺秘要古今錄療魚鯁骨橫喉中

六七日不出取鯉魚鱗皮燒作屑以水服之
卽出未出再服

簡誤

六陰已極陽氣初生故能發熱動風風熱病
者不宜食天行病後下痢及有宿癥者俱不
可食不宜合犬肉葵菜食服天門冬硃砂人
不可食凡炙鯉魚不可使烟入目損目光三
日內必驗也前和劑局方烏金散方內有肉

桂當歸延胡索赤芍藥皆行血之藥而其所以
主病內開載崩中下血過多不止用之則大

神農本草經疏卷之二十一

蟲魚部中品

總五十六種今疏其要者一十七種

蝟皮

露蜂房

龜甲

蟹

蟬蛻

烏賊魚骨

原蠶蛾

蠶沙附

蠶退

白殭蠶

鰻鱺魚

蝓蚰

蝓牛并入

蜚蠊

麈蟲

青魚膽

石首魚

鱸魚

蝟皮味苦平無毒主五痔陰蝕下血赤白五色
血汗不止陰腫痛引腰背酒煮殺之又療腹痛
疝積亦燒為灰酒服之

得酒長畏枯
使麥門冬

疏○蝟鼠類屬水其皮毛戟刺如鍼屬金故
味苦平平即兼辛大腸屬金以類相從故能
治大腸溼熱血熱為病及五痔陰蝕下血赤
白五色血汗不止也陰腫痛引腰背腹痛疝

積皆下焦溼熱邪氣留結所致辛以散之苦
以泄之故主之也肉味甘平能開胃氣止反
胃亦主痔瘻腸風

主治參互

同象牙末等治通腸漏見象牙條下 衍義

五痔下血用蝟皮穿山甲等分燒存性入肉

豆蔻一半空心米飲下一錢妙 楊氏家藏

方腸風下血蝟皮一枚木賊草半兩炒黑為

末每二錢熱酒調下

簡誤

凡食其肉當去骨誤食令人瘦劣諸節漸小也

露蜂房味苦鹹平有毒主驚癩瘕癰寒熱邪氣癩疾鬼精蠱毒腸痔火熬之良又療蜂毒毒腫疏○蜂性有毒螫人則痛極以其得火氣之甚也故蜂房味苦氣平性亦有毒別錄言鹹

當作辛鹹辛散苦泄鹹可軟堅故主驚癩瘕癰寒熱邪氣癩疾鬼精蠱毒腸痔等證也療蜂毒毒腫者取其氣類相從以毒攻毒之義也蘇恭以亂髮蛇皮三物合燒灰酒服方寸匕治惡疽附骨癰根在臟腑歷節腫出丁腫惡脉諸毒大蚰煎水漱齒止風蟲疼痛洗乳癰蜂疔惡瘡皆取其攻毒散邪殺蟲之功耳

主治參互

漏痔

子母秘錄臍風溼瘡久不瘥者蜂房燒末傅
 之効 袖珍方風蟲牙痛蜂房一枚鹽實孔
 內燒過研末擦之鹽湯漱去一方同細辛煎
 水漱之 又方喉痺腫痛露蜂房灰白殭蠶
 等分為末吹入喉內或用乳香湯服半錢
 濟眾方女人如乳乳癰汁不出內結成腫名
 妬乳用蜂房燒灰研末每服二錢水一盞煎
 六分去滓溫服 經驗方治漏痔蜂房燒存
 性研細摻之乾則菜油調傅

簡誤

蜂房主驚癇瘈瘲及諸癰疽惡毒正取其攻
 散邪惡以毒攻毒之意若病屬氣血虛無外
 邪者與大癰疽潰後元氣之竭者皆不宜服
 鼈甲味鹹平無毒主心腹癥瘕堅積寒熱去痞
 息肉除蝕痔惡肉療溫瘧血痕腰痛小兒脇下
 堅 肉味甘主傷中益氣補不足 惡礬石

疏○鼈甲全稟天地至陰之氣故其味鹹平
 無毒潤下作鹹象水剛矣本乎地者親下益
 陰何疑甲主消散者以其味兼乎平平亦辛
 也鹹能軟堅辛能走散故本經主癥瘕堅積
 寒熱去痞疾息肉陰蝕痔核惡肉別錄療溫
 瘧者以瘧必暑邪為病類多陰虛水衰之人
 乃為暑所深中邪入陰分故出併於陽而熱
 甚入併於陰而寒甚元氣虛羸則邪陷而中
 焦不治甚則結為瘧母甲能益陰除熱而消
 散故為治瘧之要藥亦是退勞熱在骨及陰
 虛往來寒熱之上品血瘦腰痛小兒脇下堅
 皆陰分血病宜其悉主之矣勞復女勞復為
 必須之藥勞瘦骨蒸非此不除產後陰脫資
 之尤急

主治參互

仲景鼈甲煎丸治瘧母之要藥 得牛膝當

歸佐以橘皮何首烏知母麥門冬治久瘧
 同知母石膏麥門冬貝母竹葉治溫瘧熱甚
 渴甚無肺熱病者加人參若瘧發熱甚渴甚
 又寒甚汗多發時指甲黯狀若欲死并加桂
 枝有神去桂枝治痺瘧良 得青蒿麥門冬
 五味子地黃枸杞牛膝治骨蒸勞熱甚則加
 銀柴胡地骨皮胡黃連 肉主傷中益氣補
 不足腹中結熱婦人漏下陰虛羸瘦性冷補
 一切陰虛人宜常食之

簡誤

鼈甲妊娠禁用凡陰虛胃弱陰虛泄瀉產後
 泄瀉產後飲食不消不思食及嘔惡等證咸
 忌之

蟹味鹹寒有毒主胸中邪氣熱結痛啣僻面腫
 敗漆燒之致鼠解結散血愈漆瘡養筋益氣
 爪主破胞墮胎

疏○蟹稟水氣以生故其味鹹氣寒本經雖云有毒然今人多食之卒無害其有毒者大抵形質怪異如後文所載諸種始有大毒耳外骨內肉陰包陽也入足陽剛足厥陰經經曰熱淫于內治以鹹寒故主胸中邪氣熱結痛也喎僻者厥陰風熱也面腫者陽明熱壅也解二經之熱則筋得養而氣自益喎僻面腫俱除矣鹹走血而軟堅故能解結散血漆

得蟹則化為水燒之可集鼠于庭此物性之相賊相制莫能究其義也愈漆瘡者以其能解漆毒故也瓜性迅利故能破胞墮胎也

主治參互

日華子產後肚痛血不下者以酒食之筋骨折傷者生搗炒罾之 陳藏器續斷絕筋骨去殼同黃搗爛微炒納入瘡中筋即連也寇宗奭小兒解顛不合以蟹螯同白及末搗

墮胎 破胞

孕婦

塗以合爲度 唐瑤經驗方骨節離脫生蟹
搗爛以熱酒傾入連飲數碗其查塗半日內
骨肉谷谷有聲卽好 董炳驗方中鱒魚毒
食蟹卽解 胡洽方治孕婦僵仆胎上搶心
有蟹爪湯 千金方神造湯治子死腹中或
雙胎一死一生服之令死者出生者安神驗
川蟹爪一升甘草二尺東流水一斗以葦薪
煮至二升濾去滓入真阿膠三兩令烱頓服
或分二服若人困不能服者灌入卽活

簡誤

蟹性冷能散血熱爲病故跌撲損傷血熱瘀
滯者宜之若血因寒凝結與夫脾胃寒滑腹
痛喜熱惡寒之人咸不宜食有獨螯獨目兩
目相向六足四足腹下有毛腹中有骨頭背
有星點足斑目赤者竝有毒不可食能害人
被其毒者冬瓜汁紫蘓蒜豉蘆根汁皆可解

目赤者
有毒

之不可與柿及荆芥食發霍亂動風木香汁
可解

蟬殼味鹹甘寒無毒主小兒癩女人生子不出

灰服之主久痢

一名枯蟬一名金牛兒凡用洗去泥并去翅足漿水煑晒乾用

疏○蟬臬水土之餘氣化而成形其飛鳴又

得風露之清氣故能入肝祛風散熱如藥性

論主小兒壯熱驚癇是矣其主婦人生子不

下者取其蛻脫之義治久痢者以其有甘寒

之功也其鳴清響能發音聲其性善蛻能脫

翳障其體輕浮能發瘡癬其味甘寒能除風

熱故陳藏器主啞病寇宗奭主目昏障翳小

兒瘡癬出不快及今人治頭風眩暈皮膚風

熱痘癩作痒疔腫毒瘡大人失音小兒噤風

天弔驚哭夜啼等證皆以其有如上諸功能

也

主治參互

同羚羊角蜜蒙花白蒺藜草决明木賊草穀
精草甘菊花夜明沙生地黃黃連女貞實治
目盲障翳 同丹砂茯神真珠牛黃蠶蠶天
竺黃釣藤鈎犀角琥珀全蝎治小兒風熱急
驚癇病 同犀角生地黃紫草麥門冬連翹
金銀花治痘瘡血熱出不快 同石膏鼠黏
子赤梔木薄荷玄參甘草葛根栝樓根麥門
冬治大人小兒痧癘 普濟方治小兒夜啼

蟬花散

不止狀若鬼祟以蟬蛻下半截爲末每一字
釣藤湯調下或入辰砂少許亦可并治天弔
驚啼 全幼心鑑痘瘡作癢蟬蛻三七枚炙
甘草各一錢水煎服 錢氏方痘後目翳蟬
蛻爲末每一錢羊肝煎湯下日二服 和劑
局方蟬花散治肝經蘊熱風毒之氣肉搏上
攻眼目赤腫翳膜疼痛昏濇內外障翳咸治
之用蟬蛻穀精草刺蒺藜甘菊花防風草决

明蜜蒙花甘草羌活黃芩蔓荆子川芎木賊
草荆芥等分爲末每二錢茶清調食後臨臥
各一服

簡誤

痘疹虛寒證不得服

烏賊魚骨味鹹微溫無毒主女子漏下赤白經
汁血閉陰蝕腫痛寒熱癥瘕無子驚氣入腹腹
痛環臍陰中寒腫令人有子又止瘡多膿汁不

燥一名海螵蛸一名
烏一名鱧骨一名墨魚

疏○烏賊魚骨稟水中之陽氣以生故其味
鹹氣微溫無毒入足厥陰少陰經厥陰爲藏
血之臟女人以血爲主虛則漏下赤白或經
汁血閉寒熱癥瘕少陰爲藏精之臟主隱曲
之地虛而有溼則陰蝕腫痛虛而寒客之則
陰中寒腫男子腎虛則精竭無子女子肝傷
則血枯無孕鹹溫入肝腎通血脈而祛寒溼

則諸證除精血足令人有子也其主驚氣入
 腹腹痛環臍者蓋肝屬木主驚驚人肝膽則
 榮氣不和故腹痛環臍也入肝膽舒榮氣故
 亦主之溫能燥溼故又主瘡多膿汁也按素
 問云有病胸脇支滿者妨于食病至則先聞
 腥臊臭出清液先唾血四肢清目眩時時前
 後血病名曰血枯得之年少時有所大斃血
 或醉入房中氣竭肝傷故凡事衰少不來治
 之以四烏鯁骨一蔥茹為末丸以雀卵大如
 小豆每服五丸飲以鮑魚汁所以利腸中及
 傷肝也觀此則其入厥陰血分為女人崩漏
 下血之要藥可知矣

主治參方

聖惠方赤白日翳用烏鯁骨一兩去皮為末
 入片腦少許點之
 澹寮方底耳出膿海蝶
 蛸半錢麝香一字為末以綿杖絞淨吹入

聖惠方小兒臍瘡出血及膿海蝶蛸乾臙脂
為末油調搽之 記 聖濟總錄骨鯁在喉烏賊
魚骨橘紅焙等分為末寒食麩和錫丸芡子
大每一丸含化 簡便單方舌腫出血不止
烏賊骨蒲黃各等分炒為末塗之

簡談

其氣味鹹溫血病多熱者勿用

原蠶蛾雄者有小毒主益精氣強陰道交接不

倦亦止精

疏○原蠶蛾乃是晚蠶第一番出者其子再
復出者為二蠶此二蠶之種其蛾性最淫出
繭便媾味鹹氣溫熱故能強陰益精令交接
不倦也日華子主壯陽事止泄精尿血暖水
臟蓋取其性淫助陽鹹溫入腎之功耳

主治參互

千金方丈夫陰痿不起未連蠶蛾二升去頭

記趙長佑

翅足炒為末蜜丸梧子大每夜服一九可御
十女以菖蒲酒止之 聖濟總錄玉枕生瘡
生枕骨上如癰破後如筋頭用原蠶蛾炒石
華等分為末乾貼瘡

簡談

少年陰痿由于失志者不宜用陰虛有火者
咸忌之

○蠶屎溫無毒主腸鳴熱中消渴風痺癰瘡原即

蠶
沙

疏○原蠶沙即晚蠶所出屎也其味辛甘氣
溫無毒腸鳴者水火相觸也甘以和之消渴
者中氣燥熱也辛以潤之蠶屬火其性燥燥
能勝溼去風故其沙主療風溼之病如陳藏
器以之炒黃袋盛浸酒去風緩諸節不隨皮
膚頑痺腹內宿冷瘀血腰脚冷疼炒熱熨偏
風筋骨癱緩手足不隨等證

主治參互

寇氏法治諸風冷用醇酒三升拌蠶沙五斗
 甑蒸于煖室中鋪油單上令患風冷氣痺及
 近感癱風人就以患處一邊臥沙上厚蓋取
 汗若虛人須防大熱昏悶令露頭面如未全
 愈間日再作 聖惠方風癢癰癩作痒成瘡
 用蠶沙一升水五斗煮取二斗去滓洗浴避
 風 儒門事親婦人血崩蠶沙為末酒服三

五錢

簡誤

癱緩筋骨不隨由于血虛不能榮養經絡而
 無風溼外邪侵犯者不宜服

蠶退主血風病益婦人一名馬明退

近世醫家多用初出

蠶子殼在紙上者東方諸醫用老蠶眠起所蛻皮功用雖相近當以蛻皮為正用之微炒

疏○蠶退如蟬蛻蛇蛻之類各因其本質以
 為用蠶退得蠶氣之餘故能治血風病血熱

則生風婦人以血為主故尤益婦人也近世以之療痘癩去目中翳障其義猶蟬蛻也

主治參互

集驗方走馬牙疳用蠶退紙灰入麝香少許貼之并治口瘡 又方治纏喉風蠶蛻紙燒存性蜜丸芡實大合化嚥津 蠶已出蛾取退煨存性為末服之能排膿穿毒瘡口

簡誤

婦人血虛無風溼者不宜用

白僵蠶味鹹辛平無毒主小兒驚癇夜啼去三蟲滅黑黥令人面色好男子陰瘍作瘡病女子崩

中赤白產後餘痛滅諸瘡癩痕

疏○蠶屬陽而僵者又兼金木之化本經味鹹別錄辛平無毒然詳其用應是辛勝鹹劣氣微溫之藥也氣味俱薄浮而升陽也入足厥陰手太陰少陽經厥陰為風木之位主藏

血小兒驚癇夜啼女子崩中赤白風熱乘肝
 臟也產後餘痛風寒入血分也辛能祛散風
 寒溫能通行血脉故主如上諸證也肺主皮
 毛而風邪客之則面色不光潤辛溫入肺去
 皮膚諸風故能滅黑黥及諸瘡癥痕令人面
 色好也男子陰瘍風溼浸淫也辛平能散風
 熱兼能燥溼是以主之三蟲亦溼熱所化故
 又能去三蟲也藥性論治口噤發汗日華子
 主中風失音一切風疰小兒客忤男子陰瘖
 痛女子帶下蘇頌治風喉痺欲絕元素主皮
 膚諸風如蟲行皆取其性屬陽風熱為陽邪
 能入皮膚經絡發散諸邪熱氣也

主治參互

同丹砂牛黃膽星全蝎麝香鈞藤鈎犀角金
 箔天竺黃蟬蛻治小兒急驚客忤 仁存方
 開關散治急喉風痺用白殭蠶炒白礬半生

趙長裕

半燒等分爲末每以一錢用竹瀝加姜汁調
 灌得吐頑痰立効小兒加薄荷一方用白梅
 和丸綿裹含之 聖惠方小兒撮口噤風面
 黃赤氣喘啼聲不出由胎氣挾熱流毒心脾
 故令舌強唇青撮口發噤用白殭蠶二枚去
 嘴畧炒爲末蜜調傅唇中甚効 普濟方治
 大人頭風及小兒驚風並用大蒜七箇先燒
 紅地以蒜逐箇于地上磨成膏却以殭蠶一

兩去頭足安蒜上碗覆一夜勿令泄氣只取
 殭蠶研水每用啗鼻口内含水有効 又方
 治腹內龜病詩云人間龜病不堪言肚裏生
 成硬似磚自灰殭蠶白馬溺不過時刻軟如
 綿 藥性論滅諸瘡癩痕白殭蠶衣魚鷹屎
 白等分傅之 聖惠方癰瘰風瘡疼痛白殭
 蠶焙研酒服一錢立瘥 小兒宮氣方小兒
 口瘡通白者白殭蠶炒爲末蜜和傅之効兼

記趙長依

治風疔蝕瘡

簡誤

殭蠶性辛溫辛能散其功長于祛風化痰散
有餘之邪凡中風口噤小兒驚癇夜啼由於
心虛神魂不寧血虛經絡勁急所致而無外
邪爲病者忌之女子崩中產後餘痛非風寒
客入者亦不宜用今世治小兒驚風不問虛
實一概混施誤甚誤甚

鰻鱺魚味甘有毒主五痔瘡癩殺諸蟲

疏○鰻鱺魚稟土中之陰氣故其味甘其氣
寒其形類蛇常與水蛇同穴故其性有小毒
甘寒而善能殺蟲故骨蒸勞瘵及五痔瘡癩
人常食之有大益也燒烟辟蚊熏屋舍竹木
斷蛀蟲置骨于衣箱中斷蠹其殺諸蟲之驗
可證矣腹下有黑斑背上有白點者毒甚不
可食重三四斤及水行昂頭者不可食妊娠

食之令胎有疾脾胃薄弱易泄者勿食

蛞蝓味鹹寒無毒主賊風喎僻軼筋及脫肛驚

疝攣縮

蝸牛味鹹寒主賊風喎僻踈跌大腸下脫肛筋

急及驚疝

蛞蝓蝸牛本經分二條今按其氣味相同主療無別惟形質稍異故併為

蛞蝓無殼可

疏○蛞蝓蝸牛稟陰溼之氣而生故味鹹氣

寒無毒經曰清靜則肉腠閉拒雖大風苛毒

弗能害也如陰血虧竭陽氣躁擾則腠理不

密賊風乘虛而入風主搖動中于經絡故喎

僻攣縮軼筋筋急所自來矣又風為陽邪筋

脉得之皆燥急鹹寒能益陰潤燥軟堅則筋

脉舒緩經絡通達而諸證除矣驚疝者風熱

也脫肛者大腸熱也踈跌者血脉傷必發熱

也鹹寒總除諸熱所以主之蜈蚣性畏二物

不敢過其所行之路觸其身即死故人取以

治蜈蚣毒

主治參互

聖惠方治大腸因熱脫肛用蝸牛一兩燒灰
猪脂和傅立縮 濟生方痔瘡腫痛用蝸牛
一枚入麝香少許以碗盛次日取水塗之丹
溪方用蝸牛浸油塗之或燒灰傅亦可 集
驗方發背初起活蝸牛二百箇以新汲水一
盞瓶內封一宿取涎水入真蛤粉旋調掃傅

瘡上日十餘度 大全良方痔熱腫痛用大
蛞蝓一箇研泥入片腦一字燕脂坯子半錢
同傅之

簡誤

其氣大寒非真有風熱者不宜用小兒薄弱
多泄者不宜用

蜚蚘味苦微寒有毒主逐瘀血破下血積堅痞
癥瘕寒熱通利血脉及九竅女子月水不通積

聚除賊血在胸腹五臟者及喉痺結塞一名

疏○蜚蠊其用大略與蟻蟲相似而此則苦

勝若能泄結性善鬪牛馬諸畜血味應有鹹

鹹能走血完素云蠱飲血而用以治血故主

積聚癥瘕一切血結為病如經所言也苦寒

又能泄三焦火邪迫血上壅閉塞咽喉故主

喉痺結塞也今人以其有毒多不用然仲景

抵當湯丸大黃蟻蟲丸中咸入之以其散臟

腑宿血結積有神効也凡毒藥之治病如刑

罰之治盜賊不如是則不足以祛邪反正書

曰若藥不瞑眩厥疾不瘳正此謂也其與病

相乖不宜用者詳著簡誤中

主治參互

入大黃蟻蟲丸治虛勞羸瘦內有乾血肌膚

甲錯兩目黯黑 入抵當湯治太陽病身黃

脉沉結少腹鞭小便自利其人如狂者 備

急方撲墜瘀血蚩蟲二十枚牡丹皮一兩為末酒服方寸匕血化為水也

簡誤

傷寒發黃脉沉結少腹鞭如小便不利者為無血證非畜血也不耳用瘀血本審的者不宜用女子月水不通由于脾胃薄弱肝血枯竭而非血結閉塞者不宜用孕婦腹中有癥瘕積聚不宜用凡病氣血虛甚形質瘦損者

忌之

麤蟲味鹹寒有毒主心腹寒熱洗洗血積癥瘕破堅下血閉生子大良一名地鼈

疏○麤蟲生於下溼土壤之中故其味鹹氣寒得幽暗之氣故其性有小毒以刀斷之中有白汁如漿奏接即連復能行走故今人以之治跌撲損傷續筋骨有奇効乃足厥陰經藥也夫血者身中之真陰也灌溉百骸周流

經絡者也血若凝滯則經絡不通陰陽之用
互乖而寒熱洗洗生焉鹹寒能入血軟堅故
主心腹血積癥瘕血閉諸證血和而榮衛通
暢寒熱自除經脉調勻月事時至而令婦人
生子也又治瘧母為必用之藥

主治參互

同自然銅血竭乳香沒藥五銖錢黃荊子麻
皮灰狗頭骨治跌撲損傷神效 仲景方大

黃麈蟲丸治產婦腹痛有乾血用麈蟲二十
枚去足桃仁二十枚大黃二兩為末煉蜜杵
和分為四丸每以一九酒一升煮取二合溫
服當下血也 仲景鱉甲煎丸治久瘧成癰

董炳集驗方治跌撲閃挫用土鱉陰乾一
箇臨時旋研入乳香沒藥自然銅龍骨各等
分麝香少許為末每服三分入土鱉末以酒
調下須先整定骨乃服否則接挫也又可代

杖

簡誤

無瘀血停留者不宜用

青魚膽主目暗滴汁目中并塗惡瘡

疏○青魚膽色青象木木氣通于肝肝開竅於目故能治目暗味苦氣寒能涼血熱故又主塗惡瘡也

主治參方

龔氏易簡方治赤目障翳用黃連熬膏入大青魚膽汁和就再入片腦少許瓶收密封每日點之甚妙 龍木論一切障翳魚膽丸用

青魚膽鯉魚膽羊膽牛膽各半兩熊膽二錢龍腦香少許石決明一兩為末蜜丸梧子大每空心茶下十九 萬氏家抄乳蛾喉痺用膽礬盛青魚膽中陰乾每用少許吹喉取吐

簡誤

目病非風熱盛而由于血虛昏暗者不宜用
服木人不可食青魚肉

石首魚味甘無毒頭中有石如碁子主下石淋
磨石服之亦燒為灰末服和葶菜作羹開胃益
氣候乾食之名為鯨炙食之主消瓜成水亦主
卒腹脹食不消暴下痢

疏○石首魚得海中水土之氣故其味甘氣
平無毒胃屬土甘為土化故能開胃胃氣開

則飲食增五臟皆得所養而氣自益矣乾鯨
其性疎利故能入腸胃寬中消食止痢頭中
石堅重下走故主下石淋也凡泄痢腹痛與
夫腸胃諸疾取忌油膩魚腥惟白鯨不忌蓋
鯨飲鹹水而性平不熱且無脂膩不惟少熱
中之患更有消食理脾實腸胃之功也

鱸魚平補五臟益筋骨和腸胃治水氣多食宜

人

疏○鱸魚秋月方美其得水中之清氣者乎
味甘淡氣平雖有小毒不至發病乃與脾胃
相宜之物也腎主骨肝主筋滋味屬陰總歸
於臟益二臟之陰氣故能益筋骨脾胃有病
則五臟無所滋養而積漸流於虛弱脾弱則
水氣泛濫益脾胃則諸證自除矣



